

Cama Tsətsəfə Nə Jiwudə

¹ Cama tsətsəfəkə sara ara Jiwudə mafa Yesu Kərsiti ənga zamiya Yakubu,

a nda nə njira nji ngga, njira Hyal Tada wu yiwu nda, nji kətiya ndalagur Yesu Kərsiti.

² Bəgə təhudə, ənga hudə pərtəu, ənga yiwukur gagadə nda də nər hyi.

Numa Ar Kəra Njira Gəra Sən Hyal

³ Nahyi bazhir 'wa də 'yar, a yiwur yi gagadəu aga ya na tsəfər hyi ar kəra mbədə kəra a'yi anə mən patəu. Ama kə yi bəra lari a dəri tsa'a aga ya tsəfər hyi ənga ya nar hyi, abər hya nərdzau wu mbərsar hyi, kəra nji nə anə nji cici gə Hyal aga zəm wacu, gəra cakau.

⁴ Səra də yi na abangə kau, ca ngə alenyi nji a'yi kəra hələwa dzə a vu hyi, njira dədəməu a thlana ndar nji numa. Nji'yar kau, a'yi njir nu Hyal nga nda mai, nanda ngə njira shabiyar mayiwakur Hyal lagur səm gəra səlikur nə duniya ənga ndə kəpalna Yesu Kərsiti Thlagər mən.

⁵ Alaga abangau, wu sən hyi patəu, ama yu yiwu ya dəngar hyi ənggəra Thlagə mbəlbiya nji nyi sara wu Masaru, ama alaga kau, kə ji bəra dləna njira gəra mbərsa.

⁶ Ənga hya dəngari ənga waladi'yar kəra gəra bəlar miya thlərər nda, ənga ndə piyari vir nggyar nda. Nanda ngə Thlagə mbiya ənga əpa liyangə, kə ji

fuwa nda a gyu kuthləu mbamba ba'anuwā, aga nda səkə pəci numa dəgal nə Hyal.

⁷ Ənggər kərə Sodomu ənga Gwamwara ənga məlmə'yar kərə zəwar nda, lər kərnda anə səsukur ənga nggya dedeβəu, a cabiyar nda anə nji ənggərə nji wu nda sa βwaβwatəu wu u'u nə ba'anuwā.

⁸ Abangə tsu ngə njir shuni'yar kə deβəna dza kərnda, ənga ndə nggəl ara nu sərə njir dənāma nə təlkur wu na, ənga nanda tsu ndə ndər didədidə ar kərə waladi'yar.

⁹ Ama alaga Mayikalū dəgal waladi, ar pəcira ndu pəpa ənga shatan arya dza Musa kərə tətəu, naja a'yi na ndər dididi anə shatan mai, ama sərə ji na wacu, “Thlagə ja kughiya ngau.”

¹⁰ Ama nji kau, nda vər ndər dididi ar kərə sərə nda gərə nggabiya, ənga sərə ndu nggani lagur kumər dzau ənggər sərə mələ sər shishi, sə'yar kə ngə wu nda dləna nda.

¹¹ Sər təhudə anə nda, ara a hər nda sər mələ Kayinu, a kusar nda kər nda a vu nggyabiya Balamu lagur gal gənna, lagu kau dlənar nda kərnda wu hya'a hangəkal culi nə Kora.

¹² Najaka nji sə dididi nga nda wu hyi ma hya vər səm sər səm nə yiwukurər hyi, nda vər səm sər səm əkkə'yi hyi wu gərə səlikur ənga hivərkur. Nanda njir βəla ngau, kərə sər gu ta nda nga ndu sən wacu. Ənggər dlama kərə gərə tədə par nga nda, kərə wu thla ba yambadə a tətəlna. Ənggər wu kərə gərə ya nga nda, wu kərə nji labiya ngilanga nda ba ndə tətənakər shaushau.

¹³ Nanda ənggər dləgwamər 'yimi tsadau kərə a vər thləkau, sər mələ nda sər shili ənga səli ngau.

Nanda ənggər shashilga kəra a vər 6ə6ə sər nda, kəra kuthlə kiyakiyar situ nga vər səkə nda nə ba'anuwə.

¹⁴ Enoku, kəra naja ngə ndə mədəfəkura nyi sara ara Adamu, nana ndərhaha ar kəra nji kau, abər, “Kəja, Thlagəu a vər shili ənga nji cici nyi dubu duburam,

¹⁵ aga ja sa thlana nyi numə anə kalar ndau, ənga aga ja cabiya nyi anə kalar njira gəra wu nu Hyal patər sər mələ nda kəra dididī, kəra a'yi wu lagu nu Hyal mai, ənga kalar ndər dididī kəra njir bikau, nji gəra nu Hyal nana ar kəra ja.”

¹⁶ Nji 'yar kau, njir ngunguni ngau, ənga njir gal bikə ndau, lagur dəmwa'yikur nda ca nga nda nu, njir 6wasə ənga kərnda nga nda, ənga njir ndər sukwa nji aga nda fa'abiya sə wu tsa nji nga nda.

Ngga Nə Nggya Wu Cinapi

¹⁷ Nahyi bazhir 'wa də 'yar, hya dəngari sərə cama səsə'yar nə Thlagər mən Yesu Kərsiti na dədəməu, abər nda də.

¹⁸ Ndə nar hyi abər, “Wu kudiyar pəci njir dida vi wu nda də a'yi, njira wu nu lagur kərnda, lagu kəra gəra nə Hyal.”

¹⁹ Nji 'yar kau na nda ngə njira təkəbiya kəra hyi, njir yiwu məl sə wu ndəndəkər, ənga tsu Mambəl Hyal a'yi ara nda mai.

²⁰ Ama nahyi bazhir 'wa də 'yar, hya hərya kərər hyi wu mbərsar hyi kau, kəra cici gagaɖau, ənga hya kədi Hyal wu Mambəl Cica.

²¹ Hyə tsərpər kərər hyi wu yiwukur nə Hyal, ənggər kəra hyə vər səkə təhudə nə Thlagər mən Yesu Kərsiti aga ja hər hyi a shili wu pi gəra kudau.

²² Hya təhudə əgya njira ənga kər məməthlu,

²³ hya mbəḏana alenyi nji lagur mbəlbiya nda sara wu u'u, alenyi nji hya cabiya nda təhudəu, ama daḅə ənga hivərl, ənga piyari shishir dza nda a sara kar zhizhigər kəra ar dza nda a sara deḅəna hyi.

Kədi Hyal Nə Fal

²⁴ Anə ndəra ənga dənama nə kar hyi ara dla, ənga ja lər hyi gəra ənga vazau wu mwar kadakadarkur nyi ənga hudə pida pida gagaḏau,

²⁵ anə Hyal kəra zəm Ndər Mbəḏa mən, kadakadarkur, ənga dəgalkur, ənga dənama ba ənga dənama təlkur nə nyi ngau, lagur Yesu Kərsiti Thlagər mən, tsu dədəməu, ba'anə kabangəkau, ənga ba'anuwa! Amina.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95